

Serah kertas siasatan kepada Peguam Negara



Kereta Perodua Myvi yang melanggar dua kenderaan sehingga menyebabkan kematian seorang anggota TLDM pada Sabtu lalu. Gambar kecil: Zamri Shariff

ISKANDAR PUTERI - Kertas siasatan kes pemandu wanita yang menyebabkan kematian seorang anggota Tentera Laut Diraja Malaysia (TLDM) pada Sabtu lalu diserahkan kepada Jabatan Peguam Negara semalam.

Ketua Polis Johor, Datuk Ayob Khan Mydin Pitchay berkata, kertas siasatan itu diserahkan Ketua Bahagian Siasatan dan Penguatkuasaan Trafik Johor Bahru Selatan, Deputy Superintendan Zamri Shariff di Pejabat Undang-Undang Negeri Johor pada jam 9 pagi semalam.

“Perjumpaan pagi semalam membabitkan Ketua Bahagian Siasatan dan Penguatkuasaan Trafik Johor Bahru Selatan dan pegawai penyiasat kes bersama Pengarah Pendakwaan Negeri Johor bagi memberikan

**PEMANDU
MYVI LANGGAR
ANGGOTA TLDM**

taklimat dan cadangan pertuduhan bagi kes ini,” katanya menerusi kenyataan di sini semalam.

Dalam pada itu katanya, pemandu wanita itu telah dibebaskan dengan jaminan polis.

Pada Ahad-lalu, polis menahan wanita pemandu Perodua Myvi yang terbabit kemalangan dengan sebuah kereta Honda Accord dan sebuah kereta Proton Iswara di Kilometer 4 Jalan Johor Bahru - Kota Tinggi di sini.

Kemalangan itu menyebabkan pemandu kereta Honda Accord, Laskar Kanan Mohd Rizal Buseri, 31, maut di tempat kejadian.

Ujian air kencing ke atas pemandu wanita berusia 23 tahun itu mendapati dia positif dadah jenis methamphetamine, tiada lesen memandu selain cukai jalan tamat tempoh.